



**SIARAN MEDIA
(UNTUK EDARAN SEGERA)**

TANGANI PERUBAHAN IKLIM UNTUK JAMIN SEKURITI MAKANAN

Rome, 5 Julai 2017 - Malaysia menyeru masyarakat dunia untuk mengambil langkah-langkah perlu bagi menangani fenomena perubahan iklim supaya ia tidak menjejaskan penghasilan dan sekuriti makanan serta pendapatan petani, terutama di negara-negara membangun.

Timbalan Menteri Pertanian dan Industri Asas Tani, Datuk Seri Tajuddin Abdul Rahman menyuarakan demikian ketika berucap di Persidangan *Food and Agriculture Organisation of the United Nations* (FAO) Ke-40 di sini hari ini.

Dalam ucapan tersebut beliau menjelaskan usaha-usaha yang telah dilaksanakan oleh kerajaan Malaysia dalam menangani masalah perubahan iklim yang turut memberi kesan ke atas sektor pertanian negara.

Tajuddin turut mengutarakan kepentingan pembiayaan untuk menangani isu perubahan iklim di negara-negara membangun.

“Kita perlu memainkan peranan yang lebih agresif untuk menangani perubahan iklim, terutama kesannya kepada pertanian dan sekuriti makanan, yang boleh menjejaskan usaha kita untuk membasmi kemiskinan dan kelaparan.

Negara-negara membangun memerlukan kepimpinan kukuh FAO untuk memperbaiki senario global masa kini.. Lebih banyak sumber dana diperlukan untuk membiayai usaha negara-negara membangun dalam mengatasi permasalahan ini. Melalui inisiatif ini, kemiskinan global dapat dikurangkan dan bekalan makanan akan lebih terjamin,” ujar Tajuddin.

Tajuddin mengetuai delegasi Malaysia ke persidangan yang diadakan dari 3 hingga 8 Julai ini dan turut diiringi oleh Timbalan Ketua Setiausaha Dasar Kementerian Pertanian dan Industri Asas Tani, Datuk Mohd Sallehuddin Hassan.

Beliau turut mewakili Kerajaan menandatangani dokumen garis panduan kerjasama antara Malaysia dengan FAO. *Country Programming Framework* (CPF) ini menggariskan bidang-bidang keutamaan dalam melaksanakan program-program kerjasama dan perkongsian di yang memberi manfaat kepada Malaysia.

FAO diwakili oleh Dr. Kundhavi Kadiresan, Wakil FAO ke Rantau Asia dan Pasifik bagi menandatangani dokumen tersebut.

Penyediaan dokumen ini membolehkan kedua-dua belah pihak meningkatkan kerjasama dan perkongsian seiring dengan pelan pembangunan dan dasar semasa negara. Penerimaan CPF antara Malaysia dan FAO membuktikan komitmen kedua-dua pihak dalam aktiviti yang bakal dijalankan berdasarkan bidang keutamaan yang dikenal pasti iaitu:

- Peningkatan sekuriti makanan dan pemakanan
- Kelestarian pengurusan agro-ekosistem
- Perubahan iklim
- Adaptasi dan mitigasi
- Pembangunan sistem makanan dan rantai nilai yang menyeluruh

Persidangan FAO diadakan secara dwitahunan, dan merupakan forum untuk membincangkan dasar, hala tuju dan mekanisme pelaksanaan FAO di peringkat pusat. Sebanyak 194 delegasi negara yang menyertai persidangan akan membincang dan merumuskan agenda FAO di bawah tema "Climate Change, Agriculture and Food Security". Peranan FAO adalah penting dalam menangani isu sekuriti makanan dan perubahan iklim yang mempengaruhi pengeluaran makanan. Di samping itu, FAO turut berperanan dalam mencapai sasaran pembangunan mapan (Sustainable Development Goals) menjelang tahun 2030 yang juga merupakan agenda global ketika ini.

#####

Sebarang pertanyaan, sila hubungi:

Mohd Asril Idris

Ketua Komunikasi Korporat

Kementerian Pertanian dan Industri Asas Tani

asril@moa.gov.my , 013-3448185